

ԶԱՐ ՄԱՐԴՈՒ ԼԵԶՈՒՆ

Տերեւի պէս չորանայ չար մարդու լեզուն,
Երբեք ինձ չի մոռանայ չար մարդու լեզուն:

Ես նստել եմ մեն - մենակ ու միտք եմ անում,
Ա՛խ, ե՞րբ պիտի մահանայ չար մարդու լեզուն:

Թէ ես վառեմ մատներըս էլ մոմերի նման,
Կը բամբասի անխնայ չար մարդու լեզուն:

Արծուի նման երկինքն էլ թէ ես վերանամ,
Իմ ճամբից չի հեռանայ չար մարդու լեզուն:

Կարիճի պէս սեւ թոյն է իմ վերքին թափում,
Միշտ անխիղճ է ինչպէս մահ, չար մարդու լեզուն:

Ես ճամբորդ եմ, նա ճամբին կոյր բու է վայող,
Ա՛խ, ե՞րբ պիտի համրանայ չար մարդու լեզուն:

Ինչպէս փշոտ մի մացառ թող կեանքի արտից
Առ միշտ պոկուի, չքանայ չար մարդու լեզուն:

Սիրահար չեմ անէծքի, բայց թող թոնիրում
Վառուի, այրուի, մոխրանայ չար մարդու լեզուն:

Ունենայի եթէ երբեք մի սուր մկրատ,
Կը կտրէի հենց հիմա չար մարդու լեզուն:

Երբ որ իմ այս երգը կարդայ, էլի իմ վրայ
Պիտի փրփրի, չարանայ չար մարդու լեզուն:

ԱՇՈՏ ԳՐԱՇԻ